



Naka Bulle en QBR verstewig hul Superliga-posisies

Koos Venter

Terwyl Quins-Bobbies (QBR) die afgelope naweek hul posisie op die Superklubliga-punteleer verder verstewig het met nóg 'n bonuspunt-oorwinning, lyk Centurion se kans al hoe skraler om dié liga se halfeindronde te haal.

ABE Midas Naka Bulle het hul posisie in beide die Super klubliga en die Carltonbeker-toernooi verstewig en hul kans lyk al hoe beter om later vanjaar die

Blou Bulle se verteenwoordiger by die nasionale Goue bekertoernooi te wees.

* Centurion het ABE Midas Naka Bulle baie hard laat werk vir hul oorwinning van 38-22 in dié klubs se tweestryd op laasgenoemde se tuisveld in die Moot.

Riaan Brand se manne het beslis Moot toe gereis om hul veldtog te red en hulle het vir groot dele van die wedstryd gebiedsvoordeel en balbesit oorheers.

ABE Midas Naka Bulle het egter daarin geslaag om hul kans beter te benut.

Dit het hulle in staat gestel om teen rustyd reeds die bonuspunt in die sakkie te hê met vier drieë en 'n voorsprong van 24-5.

Net voor rustyd het Centurion egter 'n groot terugslag beleef toe hul woelige agtsteman Gilbert Chalmers met 'n rooi kaart gestraf is ná 'n boorvat op 'n teenstander. Omdat die slagoffer op sy kop en nek geland het, het die skeidsregter geen ander keuse gehad as om dié maksimum sanksie toe te pas nie.

Centurion het die tweede helfte met verwoede aanvallende rugby begin en selfs eerste punte aangeteken. Toe die tuispan op 'n stadium vroeg in die tweede helfte twee voorspelers binne 'n minuut met geelkaarte verloor, wou dit selfs lyk of Centurion kon terugkom in die wedstryd.

Sylvester Booysen kon met puik leierskap egter daarin slaag om sy manne kalm en gefokus te hou en hulle het nog twee keer gaan druk om die gaping op die telbord tot 28 punte te rek. Die besoekers uit die suide het nooit gaan lê nie en met 'n vasbyt vertoning kon hulle daarin slaag om teen die einde van die wedstryd nog twee keer te druk vir 'n welverdiende bonuspunt.

* QBR het hul posisie verstewig met

'n bonuspunt-oorwinning van 38-32 teen die gevaarlike span van East Rand United (ERU) van Reigerpark in Boksburg.

Die Oos-Randers is waarskynlik die Valke se beste span in die liga en hulle is baie kompetend op hul tuisveld in Reigerpark. Hulle het Centurion 'n paar weke gelede verras, nadat hulle ABE Midas Naka Bulle ook vroeër goed skrikgemaak het.

QBR kon vyf drieë druk teen die tuispan se vier en die rustyd telling van 21-17 in QBR se guns getuig ook daarvan dat dié wedstryd, wat tot die einde in die weegskaal was, besonder taai verloop het.

Gert Mulder en Johan Kluyts kan dus baie tevrede wees met hul oorwinning en die vyf waardevolle ligapunte wat hulle uit Boksburg kon terugbring.

* Rustenburg Impala het intussen Saterdag op hul tuisveld die ander oorblywende span uit die Valke se gelede, Springs, met 75-14 afgeslag om hul aanspraak op 'n plek in die Superliga se halfeindstryd te bevestig.

Impala het 11 drieë ingeryg teen die moedige manne van Springs, wat self net twee keer die doellyn kon haal.

* Brakpan het onttrek. Tuks het teen 'n Bloubul-uitnodigingspan gespeel en gewen.



ABE Midas Naka Bulle se puntemakers teen Centurion. Van links is Ian van Deventer, Marnus Coetzee, Louis van Biljon, Anton Beswick, Frans Botha, Sylvester Booysen.
Foto: Johanna de Vos